

四庫全書

集部

欽定四庫全書

集部

攻媿集卷三十八

詳校官石中允臣薩敏

主事臣呂雲棟覆勘

總校官庶吉士臣倉聖脉

校對官中書臣王鍾泰

校對官中書臣牛稔文

膳錄監生臣張鱗

膳錄監生臣許紹錦

欽定四庫全書

攻媿集卷三十八

宋樓鑰撰

外制

太府少卿兼知臨安府袁說友權戶部侍郎

敕朕攬收人才思裕拜用足兵雖急要先足食之言大計是謀當求大度之士是為儒者之效孰曰民曹之難具官某文有英詞神無滯用蚤登館學嘗接武于華途

旋歷麾符屢策勲于劇部居輦轂彈壓之任知里閭銖兩之姦前張後王聲望相繼東賈西萬豪猾自消疊膺畫接之榮擢寘地官之貳損上益下朕欲圖加賦之寬理財正辭爾尚明盍徹之意

直祕閣兩浙運判王厚之直顯謨閣知臨安府

敕具官某國家駐蹕吳會視古天府民日庶事日繁師帥之寄尤難其人以爾先世嘗為京尹治行超卓如漢章尊汝實是似故以命汝自其少時博雅篤學世味冲

澹若將終身焉一行作吏所至辦治處之以榮觀而超然投之以劇繁而不亂是宜居此官者輟自漕臺加畀延閣用為爾寵唐人有言輦轂之下先彈壓郡邑之治本惠養此言殆未純也五方之民固為厖雜九縣之衆尤須撫字威惠交孚則為稱職且稱其家矣

戶部員外郎黃黼直祕閣兩浙運判

敕具官某部使者之職重矣而畿漕視他路尤劇近歲率用儒者不惟職務整辦惠愛遂及于浙河之東西是

不可改也以爾起由膠庠凝粹而開敏嘗使江東得斂
散之宜澄按列城不苛不弛茲由郎省付以漕事寓直
延閣以示寵嘉矧在鄉邦周知利病爾能罷行之下有
月旦之評上有公朝之論當不日而徹聞矣勉哉

李大卞知洋州

敕具官某洋川在東蜀為望郡通儻谷駱谷之道據黃
金戍之險賢牧風流相傳左符不以輕畀也以爾家世
循良明習吏事雖安於閒退而閱歲已多勉為一行以

副朕選用之意

虛恨蠻酋首成忠郎表弄滿三年轉一官

敕具官某國家銓法文臣以四年武臣以五年乃得進秩三載攷績不以施諸庶僚也以爾慕義中華誓保西南塞下郡將有請升爾一階益貞乃心毋替于舊

監建康府權貨務武翼郎趙公遜修武郎丁昌時收趁增羨各轉一官

敕具官某等摘山鬻海之利權之以佐軍需其數實繁

爾仕陪都歲課登衍何愛一秩以勸後來

周秘大理寺丞

敕具官某李官之屬率以文法進求其持身無玷缺以

儒術飾吏事者尤難其人爾起名家父于棘寺嘗為丞

為正矣試郡有稱奉最來歸

奉一本作奏與前卷奉最言歸論奏明辦互證當

奉再轉為丞復典臬事雖若小迂而榮途自此無壅矣

隨龍御前忠佐馬步軍都軍頭陸安轉遙郡刺史

敕具官某郎選在今為甚重雖朝列名流必著外庸而

三尺則有司執法以裁正既進六資則朕之寵命復行上下俱為得體而爾受之亦宜往刺一州益務中恪

浙西提刑葉適吏部員外郎

敕具官某郎選在今為甚重雖朝列名流必著外庸而後授今得人物之英為之則又增重矣爾博極羣書洞視千古文章之發追配作者頃由冊府試以郡寄臨事知變就畀使節以寵之天官名曹實為星省之冠是不于爾而誰屬簡要清通爾其兼之

判潭州周必大判隆興府

敕詔起東山已報長沙之政符分南服尚提新府之封
乃瞻元台載颺明訓具官某閎深而肅括堅正而裕和
極論思獻納之工盡輔贊彌縫之用始終一節光顯三
朝進退百官聚英才而在列總領衆職任大事以不疑
方安藥館之閒往鎮藩方之遠眷懷不替委寄則均政
化流行有類上公之分陝威名孚洽共期大老之歸周
惟此南昌尤為要地爰命三孤之重式邁十乘之行矧

爾寓居之鄉實今賜履之下既喜衮衣之寢近抑欣晝
錦之有光先聲所臨羣聽自聳噫令行庭戶當還帶牛
佩犢之風福及京師更佇自葉流根之效來綏四國式
憲萬邦

朱熹知潭州

敕具官某十國為連師帥是寄矧長沙控湖湘上游賜
履甚廣視邦選侯尤難其人以爾古學粹深風節峻特
可以為世之師仁心仁聞威惠孚洽可以為時之帥兼

是二者往臨藩方聲望所加列城聳服儒先相望士氣
方振爾其為朕教之楚俗雖安尚有凋瘵爾其為朕撫
之典刑所存奚俟多訓

陳公亮江西運副

敕具官某朕惟郡邑官吏至繁不勝其選故精擇部使
者付以揚清激濁之寄以爾抗直而詳諫由宰掾持七
閩使者節按刑畿甸又有能聲是豈可一日使之家食
而不在事易節待次姑以徇爾之私大江之西將輸事

重益謹厥職以副眷懷

吏部郎中林湜太府少卿

敕具官某版曹總國用之要而帑藏分之有司必以外
府處其中所以檢柅財貨之出入不嫌于詳其可以輕
畀哉爾奮身儒生習于吏治在縣為賢大夫入朝為才
御史澄按兩道攝承十連皆有聲績徹于朕聞召寘郎
闈靖共爾位進之少列以慰公言率屬究心使上下兼
足爾其懋哉

戶部郎中趙謚軍器監

敕具官某戎監之設本以嚴飾武備而休兵歲久繕修之職各有司存長貳亦惟總兵凡而已以爾舊弼之孫克自抑畏久在郎省能寡悔尤序進為長仍攝民曹往其祇欽毋替于舊

龍圖閣學士正議大夫韓彥直磨勘轉官

敕夙嚴銓法所以示百僚之公優待從臣猶不忘三載之攷具官某材猷通敏政術闡明歷事三朝負縉紳之

素望投閒十載號簪橐之舊人心安藥館之居職寓河
圖之峻年勞既久官簿愈高用為晚節之華其服寵光
之渥

寶文閣學士大中大夫顏師魯轉一官致仕

敕奉香火于真祠方徇投閒之請掛衣冠于神武遽騰
告老之章雖欲挽留不如得謝具官某性資剛毅政術
疏通幼學壯行曾不渝于一致出藩入從蓋詳試者累
年往使殊鄰抗節不撓進登常伯典銓尤明一辭宸陛

之嚴游鎮泉山之遠力求閒退方念儀刑不知何恙之
深載覽引年之奏俾升官簿以寵老臣眷簡未忘姑遂
明農之志始終無玷尚餘許國之忠服此恩光體予至
意

顏師魯贈四官

敕垂車得請尚想履聲之餘易簣有言猶存尸諫之意
愴老成之已矣念冥漠以憮然具官某受才高明植操
堅特莅官行法所至有循吏之風憂國愛君直欲任天

下之重獨辭榮于八座乃斂惠于一方身退而名益彰
年高而德彌邵眷舊臣之無幾驚遺秦之遽聞超進文
階仍延世賞仰無愧俯無忤何謝古人生也榮死也哀
終全晚節眷惟英爽歆此寵靈

正議大夫尤袤轉一官守禮部尚書致仕

敕位列儀曹屢上求閒之請恩隆儲案俯從納祿之私
茲焉告歸于以示寵具官某器資精敏學業淹該隱帙
奧篇了辨無爽殘膏賸馥霑丐為多冊府道山極一時

儒學之選詞垣翰苑兼兩朝制誥之工比訖外庸進儀
清禁命之夕拜有唐人批敕之風擢以春官當虞臣興
禮之任乃因感疾遽欲辭榮俾陟崇階以華晚節李綱
乞骸而去肯久于尚書孔戣得謝而歸仍加于禮部尚
祇渙渥無媿前良

尤袤贈四官

敕舊老遺榮猶有留行之意表章載覽忽形垂絕之言
天不懿遺人所嗟惜具官某以時耆德事朕初潛蚤歲

宦游殆及王楊之接晚年貴重遂從園綺之招古事今
事問無不知大言小言進必有補爰暨纂承之日首叅
侍從之班召自藩方喜典刑之如故擢居瑣闥嘉悻直
之不衰圖任方深求歸何亟雖弗至甘盤之罔顯恨不
許彥博之少閒喪此良臣動予深念進四階而命秩按
三尺以疏恩學焉而後臣之正賴多聞之益死者如可
作也抑惟斯人之歸或其有知毋悼不幸

起居舍人陳傅良起居郎

敕具官某言動之屬史官固有左右之異朝廷之用賢士豈以日月為功試之加詳旨則有在爾窮百氏之學發六經之文身方在于布衣名已傳于海內外庸既訖衆望愈歸比再入于脩門寢擢居于清貫叩其著述之業登之記注之司螭陛直前善開明于朕意鳳池共二能震耀于王言執義不回秉心無競稍遷厥職以重此官庶幾朝宇之間猶見儀刑之舊載纂高皇之典仍陪元子之遊益啓乃心毋忘忠告

祕書郎彭龜年起居舍人

敕具官某朕修明官制用之有條識拔人材待以不次
惟此柱下史在邇列以尤親取之中祕書追近時之罕
有既云遴選安得異辭爾操守堅剛論議剴切端公辟
屬贊臺院之宏綱冊府為郎號士林之翹楚擢真螭頭
之直俾陪豹尾之班不循年限而授此官深得用魏謩
之意掌錄時政以付國史尚克遵唐室之規益效忠猷
以酬異渥

朝請大夫權刑部尚書京鏜磨勘轉官

敕六卿分職皆吾從橐之臣三載陟明優爾吏銓之制
具官某謀謨宏達識度恢洪頃膺慈宸之知徑上甘泉
之列張旌而使萬里折戎虜以不驕叱馭而鎮兩川撫
民夷而咸服召登宸陛下寘秋官茲以年勞應于治典
爰峻文階之等益增禁路之光尚服恩榮式殫猷告

兵部尚書羅點落權字

敕尚書古之納言必求德望之妙武部周之司馬實惟

邦正之專肆疇已試之良爰錫其真之寵具宮某訐謨
經遠雅量鎮浮蚤歷近臣自有老成之譽素多仁聞仍
全剛毅之資推愛人利物之心為致君澤民之業詞掖
久推于潤色經幃尤賴于講明旅登聽履之聯兼莅典
銓之重儀刑朝著滿歲已深領袖從班優賢可後有常
德以立武事正需舊學之規以軍令而振國容方倚壯
猶之助往祇成命式贊永圖

兵部侍郎耿秉落權字

敕朕旁招賢士遴選從臣惟我舊人載處五兵之貳不煩滿歲遂頒一札之書俾正厥名敷告于衆具官某姓資剛果器識宏深夙志功名善談當世之務屢更事任專以斯民為憂故典州則千里舉安而將命則列城蒙惠徧儀華貫寢簡予衷掄才甫上于禁途引疾遽收于朝蹟勿藥有喜盍歸乎來留賓適聯方藉論思之益願全晚節尤高廉退之風乃加真除俾鎮雅俗橐弓雖久豈忘武備之修持橐甚休益謹忠猷之告尚承至意毋

有遐心

工部侍郎謝深甫落權字

敕朕昭德塞違臨政願治乃瞻吉士游兼夕拜之官樂
聞嘉言俾正冬官之貳固云試可實示褒升具官某性
稟粹純行能庸敏被聖父非常之遇膺周行不次之除
嗣服云初首居郎省量才既審擢真諫垣顒顒朝望之
益高疊疊奏篇之切當晉登在陞咸推記注之功就尹
中都更資彈壓之重持橐優遷于起部典銓仍領于選

曹載輸批勅之忠尤見愛君之篤豈應久次宜遂為真
疇若予工匪求精于技巧毋替朕命尚益效于論思

汪德輸知宗慶府

敕具官某始吾高宗開公社之封實自蜀國尋以宗慶
名軍蓋久而後冠以府號地望滋重矣選侯可輕乎惟
爾祖首貳元帥府以佐中興爾為恂恂克守家法簡池
之政平易無華畀以左符往守茲蜀念之哉無忝爾祖
則不負寄委此邦之意

宮人符燕燕轉永寧郡夫人李進進轉通義郡夫人

敕朕飭修內治靡形色選之私周覽掖庭爰秩婦官之
序有嘉女德用錫命書具封某婉孌自將柔良有素知
小星盡心之美不見驕盈承穆木逮下之恩惟加肅謹
寢歷歲時之久備殫夙夜之勤分樂土以疏封賁小君
而示寵其祇渙渥益懋芳猷

汪義端知舒州

敕具官某淮右諸郡職優而事簡舒其尤也爾蚤登甲科蔚有時望近膺親擢欲振臺綱引去翩然留之不可爾才辦劇屢更盤錯是邦簡靜游刃有餘其與斯民相安于無事以稱朕安邊固圉之意

集英殿修撰知紹興府趙不流知廣州趙彥操職事修舉並除煥章閣待制

趙不流

敕報政輔藩又見期年之變疏恩中宸載加禁路之榮

具官某慶席仙源才優吏道頃由輦轂彈壓之任遂為
朝夕論思之臣寶婺分符備著蕃宣之效會稽奏課曾
陞論議之臣寶生黃堂庭無留事風行黔首時有譽言
登之持橐之職壯我維城之勢帥臨十國方為久任之
圖位列四松不減近班之寵尚祇明命以訖外庸

趙彥操

敕帥閭雄尊著南海于蕃之蹟璽書勉勵陞西清次對
之華惟我宗英被茲渙渥具官某才猷敏幼學識該通

蚤膺聖父之知道寘列卿之長俾兼天邑有趙張之威
名進攝地官熟研桑之心計一辭位著久閱星霜姑蘇
宣三載之勞章貢總數州之重頃踰庾嶺往鎮番禺撫
蠻徼以不驚惠賈胡而無擾載嘉善最俾正從臣望雲
以求蓬萊母謂鵠行之遠把麾而去江海乃通豹尾之
班茲曰殊恩益圖來效

端明殿學士正奉大夫致仕鄭丙贈四官

敕引年已久無復尚書之履聲遺奏忽聞庶幾太史之

尸諫舊臣無幾卹典宜加具官某氣直而能溫性剛而
善下立朝正色為多士之表儀典選盡公慕古人之風
裁海更名郡遂返故鄉奉祠館以怡神據禮經而告老
謂因閒適可迪壽康不知何恙之深遽起云亡之嘆疊
升命秩仍茂賞延八座班高篤始終之不替九京恩及
尚英爽之有知

資政殿大學士通議大夫范成大轉一官致仕

敕圖舊人而共政方媿未能引大體以乞身胡為有請

嗟名臣之老矣撫往事以慨然具官某俊逸不羣風流
自命文章甚偉崔蔡誠不足多制誥尤工王楊當為之
伯緒餘所出施設具宜桂海冰天望皇靈而益遠瀛壖
蜀道專制閭以增雄是誠宣力于四方宜俾進宮于兩
地出司留籥遂奉祠庭用之未盡其才退而自求其志
卧公幹漳濱之疾掛隱居神武之冠寵數彌光典刑斯
在噫胸中之有兵甲世稱小范之才高扁舟之泛江湖
或謂鴟夷之仙去皆爾鄉閭之舊豈其苗裔之餘無忝

前良以全晚節

范成大贈五官

敕舊弼遺榮方遂垂車之志需章上奏忍聞易簀之言
天不慙遺人其殄瘁具官某身登二府仕歷三朝詞章
議論之高無慚古昔東西南北之表咸著威名曾輔政
之幾何乃居閒之寢久九齡之風度可想晉公之神明
不衰石湖忽墮乎文星壽櫟遽成夫陳迹云何不淑而
至於斯念三吳人士之無多嘆一代風流之幾盡躡五

階而進秩按二品以疏恩噫三仕三已而賦歸豈復計生前之事一官一集之傳遠尚得垂身後之名其或有知當自無憾

軍器少監黃由將作監

敕具官某朕有元子愛之固深而教之惟恐不至一時賓僚極儒雅之選爾以倫魁之彥久儀羣玉之府侃侃正色抗論不回自少匠而為長蓋亦寵矣技巧精能非以此望汝也橫經朱邸使吾兒有直諒多聞之益是惟

休哉

開府儀同三司判隆興府趙雄少保致仕

救舊弼偃藩方倚上流之重需章請老遽求故里之歸
逝矣莫留惻然興感具官某謀謨宏遠識度恢洪洞往
古治忽之原識當今輕重之體臨機輒斷慕如晦彌縫
之功遇事敢為有黃裳經濟之畧頃辭朝會洊著民庸
起之西蜀之取付以南昌之郡仰父俯子寢銷愁嘆之
心襟江帶湖雅稱詩書之帥以疾來諗乞身甚堅雖深

軫予衷亦重違雅志其陟三孤之貴以華萬里之行噫
圖任舊人謂尚堪于大政注想元老惜不究于長才諒
服渙恩式全嘉邈

趙雄贈少師

敕垂車自適難留故相之歸屬纊有言尚篤大臣之誼
殄瘁之嘆遠邇所均具官某以庸濟之才際明良之會
坐廟堂而獨任光輔至尊之朝解印組以言旋猶高勇
退之節迨予嗣服嘗賴矢謨初為武侯渡瀘之行實重

周公分陝之寄洊更帥聞最得士心不圖柱石之衰遂
掛衣冠而去勉親醫藥猶藉典刑遽淪九京奄隔千古
爰陟公師之亞仍加世賞之延噫死生旦晝之常固達
人之所諒君臣始終之分豈卹典之可稽慨想冥途尚
歆異渥

湖北提刑張垓江西提刑知池州王謙湖北提刑
敕具官某等祖宗哀矜庶獄分道置使前古未有也朕
承丕緒尤遴于擇人爾垓名臣之子尚有家法爾謙儒

林之彥尤長吏才大江之西人以終訟為能重湖之北
民有敢攘之擾各務澄按恤民之可矜懲吏之無良使
遠方人人自以為不冤朕將有以褒表之

朝議大夫煥章閣待制馬大同磨勘轉官

敕一麾出守實吾從橐之臣三載陟明優爾吏銓之制
具官某罷資精敏心計疏通比從惟月之班徑上甘泉
之列民曹治賦更嘉獻納之忠京口分符備著蕃宣之
效年勞寢及治典可稽俾序進于文階以增光于侯度

往其祇命益務告猶

吏部郎中錢象祖樞密院檢詳

敕具官某天下之兵本于宥庭設屬掄才實視宰掾非
夫詳練敏明之士不在茲選爾起于重珪疊組之家而
以書生自處蚤更事任若老于州縣者出入郎省殆二
十年敏而不疎審而無滯贊吾樞臣爾其選也益勉所
長以俟登用

太府丞曾三聘秘書郎

敕具官某道山蓬萊圖籍鉅萬士夫仰望真望飈車羽輪之隔遊其中者皆天下選也以爾力學自奮持論不阿憂國之心如飢如渴擢自外府徑登清貫益讀未見書以昌遠業且使四部秩然有序是為稱職哉

大理寺主簿王寧新知信陽軍劉崇之並太府寺丞

敕具官某等寺監皆有丞不外府設官獨詳焉蓋欲上裨版曹之調度下柅有司之出納不可以非其人也以

爾寧文詞蔚然明習吏道勾稽棘寺平反為多爰俾序遷以酬勞勩爾宗之聲稱籍甚蚤登著庭出守邊方占對尤敏使還朝蹟以慰公言所貴于儒者為其能通世務其以所學見之事功勉哉

宗正少卿鄭汝諧右文殿修撰之池州

敕具官某爾以科級自奮以吏諳見稱持節分符俱有聲績登之卿列進攝禁途迨命為真乃有異論朕方遴論思之選屢欲留行爾乃陳去就之餘式過其行慰彼

右文論謨之職往撫池陽凋瘵之餘式迺其行慰彼黎庶

忠翊郎屠思正監轄製造御前軍器所實及五年
轉一官

敕具官某除戎器以戒不虞國之務也爾職其事遂閱
五年何愛一官以獎勞勩

壽聖皇太后慶八十詔書文武陞朝官等加封祖
父母父母定詞

臺諫卿監郎官以上封祖父并父

敕具官某父某朕日侍慈皇推尊祖后母儀備三朝之盛壽簡增八表之崇奉徽稱于日至之長講慶禮于元正之始爰本親親之道用推老老之恩以爾積善有餘

潛光不試粵有賢子

祖父云
孫子

揚于王庭

臺官云列屬憲
臺卿少云列在

月卿郎官云列在名
曹都司云宰掾是司

聿觀縟典之行可後高年之渥爰

陞命秩以示寵光益務教忠用圖顯報

臺諫卿監郎官以上封祖母并母

敕具官某母某氏

同前制朕日侍慈皇至用推老老之恩

以爾婦道素全

壺彝甚飭粵有賢子

祖母云賢孫

揚于王庭

官官云列屬憲臺卿少云列在

月卿郎官云列在名曹都司云宰掾是司

聿觀縟典之行可後高年之渥爰

加沐邑以示寵光

即夫人爰封名郡國夫人晉封大國

職事官內外陞朝官京局京官選人在外京官

選人封祖父母父母

敕具官某父某朕以祖后壽登八袞恭侍慈皇奉上萬年之觴爰推老老之恩以廣親親之道以爾潛光不試

積善有餘

祖母并母云壺彝甚飭婦道有聞

子仕朝行身逢慶霈

祖父云孫

仕朝行朝官云子通朝藉京局京官選人云子仕中都在外京官選人云子在仕途

爰加異渥以

惠高年

知樞密院事趙汝愚初除封贈

曾祖太子少保士慮太子太保

敕我有宗臣進長樞筦雖循牆而避寵終出綽以疏榮
貴震一時恩及三世具官某分暉帝胄履善家庭九族
序遷曾不登于膺仕百年隱行乃有見于後人惟爾曾

孫既登右府亞于宮保已賁幽原爰加再命之崇遂列
三師之重前無舊比歿有餘光

曾祖母高平郡夫人龔氏文安郡夫人

敕位尊任重必有家傳積厚流光亦由閭政恩既加于
曾廟封宜進于小君具封某以柔淑之資嬪信厚之族
雖中饋之職無顯于外而內則之懿能肥其家連三葉
而益昌位元樞而鼎貴載加名郡以表芳猷

祖太子少傅不求太子太傅

敕紫樞元臣方隆于同姓青宮亞傳嘗寵于大家位既
愈崇恩亦宜稱具官某奕奕帝王之胄恂恂儒素之風
教子以經至孫而貴鳴珂佩玉雖不見于生前疊組重
圭乃追榮于身後進登一品以慰九京

祖母咸寧郡夫人晁氏濟陽郡夫人

敕世胄高華本由濟北之族慶源流衍實自召南之風
具封某躬蘋蘩之勤遵圖史之訓功容俱備典則不渝
教子有方能甘啜菽之養撫孫甚愛真有含飴之歡茲

領樞庭以翊興運頃嘗頒夫沐邑俾載益于郡封爰分
廣濟之名式慰謹終之意

父太子少師善應太子太師

敕眷我維城固多將相侯王之貴惟爾有子遂為股肱
心膺之臣可無寵光載篤餘慶具官某家法有自天資
尤高及見太平猶記開元之際結交前輩尚聞正始之
音躬曾閔之孝欽慕間平之儒雅爰謹家庭之訓遂傳
宥府之賢乃進宮師以彰陽報其祗明命益啓後昆

母安化郡夫人李氏饒陽郡夫人

敕愛君憂國繫我本兵之良媿德娠賢可後榮親之渥
具封某稟資柔懿植操幽閒以澤底之名家歸天潢之
支派

澤底一本疑底字誤因缺之攷唐李肇國史補以澤底李與岡頭盧王門崔竝稱可證其不誤

中閨甚肅不辭舉案之勤令子著名端自斷機之訓云
何不淑其後遂興游啓博陵之封以示冥途之寵

妻鄱陽郡夫人徐氏通義郡夫人

敕大臣許國有光麟趾之宗夫人起家無媿鵲巢之隱

惜悼亡之已久宜追遠以加榮具封某生自儒門嬪于
皇族身能全于婦道生弗永乎天年追夫子之登庸嗟
室人之冥漠視其爵秩賁以恩光易番水之舊封畀眉
山之新渥尚惟靈爽式克欽承

攻媿集卷三十八

欽定四庫全書

攻媿集卷三十九

宋樓鑰撰

外制

大中大夫沈揆轉一官守權吏部侍郎致仕

敕侍朝甚喜方儀荷橐之聯何恙之深忽上掛冠之請
初不聞曾子之疾乃欲為疎傳之歸具官某文有菁華
學稱博雅頃屢登於位著矧夙備於儲察嗣服云初首

頌於召節殿邦既久終入於從班謂其數罷之兼昇以
二銓之重預修史策勸講經帷造膝陳謨曾未浹日抗
章告老胡不待年許尋里社之間仍守天官之秩子騫
之在汶上莫遂挽留公幹之卧漳濱徒深懷舊尚祇渙
渥以保修名

沈揆贈四官

敕孟軻之致為臣方軫留行之念曾參之啓予手忽聞
將死之言撫往事以何追嗟若人之不淑具官某老於

文學志在事功博極羣書而發于英詞上下千載而見
之篤論任握節分符之寄所在著稱登簪筆持橐之班
於時未久抱疴自列納祿言歸當危假以奏篇眷忠勤
而隕涕爰加卹典悉按彛章進官序以甚優畀賞延而
不吝尚惟英爽歆此寵靈

皇太后慶壽武學生加封祖父母父母定詞

上舍內舍生

敕具某人父某朕以祖后春秋益高乃月正元日恭侍

慈皇仰奉慶禮錫類之恩溥及中外一命而上祖父母
父母壽登八十者始得預此爾年方從心以有子列在
右庠嘗預舍選寵以命秩祖父并父云進加命秩最為
優異其服明渙以迪壽康

外舍生

敕具某人父某朕以祖后春秋益高乃月正元日恭侍
慈皇仰奉慶禮錫類之恩溥及中外惟爾有子祖父母
列在右學年登八秩寵以恩封父母同詞加封其服渙

父母同詞加封

其服渙

恩以綏吉履

勝捷下名都
冀侯楊彥換從義郎王楫換秉義郎
敕具官某汝久隸羽林積勞可紀授以勇爵實應舊章
往其欽承益務忠恪

王進之知德慶府

敕具官某爾頃以天府貳車往守武陵突不得黔已復
報罷朕心憫焉晉康雖遠實高皇興王之地舉以授汝
以觀汝能尚其懋哉毋替朕命

大理寺丞林季友吏部郎官主管侍郎右選

敕具官某郎曹二十有八莫劇于武選文書盈几難以
徧察涉筆占位猶恐不暇非靜而敏者未易得其要領
也爾以儒者而通世務桐川奉最再轉而丞於廷尉未
久也選居星省遂典三銓鵬弁之士惟更是聽雖有抑
滯不能自伸爾其念哉勉贊而長

浙西提舉黃適本路提刑

敕具官某三丞出擁使節還為郎曹者多矣以爾之賢

列屬憲臺丞於中秘使事修舉宜俾來歸浙河以西服
爾清裁爾亦以靜退自處無羨於登仙就易祥刑之司
以為畿甸之望表廉幹儆惰偷民以不冤清我臬事朕
豈使爾徒久於外哉

宗正丞鄭公顯浙西提舉

敕具官某朕惟倉庾斂散之法山海摘煮之利分道置
使所任甚專畿甸之間選用尤重以爾學贍而文敏外
寬而內剛進丞司宗華問采暢兼掌名表蜀詞最工持

節有行去天尺五酌豐歉而賦政辨能否以簡僚惟爾之能思所以稱

龍圖閣直學士程大昌除龍圖閣學士致仕

敕引經告老為神虎掛冠之歸念舊疏榮峻龍馬負圖之職以優耆德以表高風具官某秉操堅剛著書淵博蚤游冊府擅溫厚爾雅之文晚侍儲闈賴直諒多聞之友十年筆橐人望素隆數路麾符民庸益著高蹈囂塵之表久從香火之間年既及於從心志欲祈於納祿羽

翼之資黃綺毋忘伐木之詩丘壑之有臯夔當遂考槃之樂尚祇明渙式介蕃釐

大府寺主簿林思濟大理寺丞

敕具官某先王用刑之法莫詳於甫刑一書有曰故乃明於刑之中率又於民裴彝爾蚤以經術先多士嘗誦其言矣入仕朝行有靖共之譽廷尉選丞以爾為之其試所學以廣朕欽恤之意

主管戶部架閣孫元卿太學正

敕具官某爾以甲科自奮用為掌故之官更歷艱棘蓋久而後得之退然自莫亦既再歲賢關清選爾宜居之子率以正孰敢不正橋門之士將於爾觀焉

修職郎權建寧府政和縣尉胡杞擒獲許伯祥等循兩資

敕具官某警捕尉曹職也姦民寇攘爾能致之連帥有言何愛旌賞

余永弼知閬州

敕具官某閭風錦屏之勝士誦少陵之詩恨不得身到
其地爾乃以二千石臨之豈易得哉爾起儒門萬里入
蜀洊更事任雅有能稱郡寄寢高事權益重無輕民事
克勤小物則可以稱此矣

王寅知江州

敕具官某長江上游以潯陽為重鎮分屯禁旅控禦一
面守將非它郡比也以爾三領左符老子吏治番易之
政人多稱之其殫撫字之心無改中和之舊使兵民晏

然隱若敵國則不負選侯之舉矣

丁逢潼川府路轉運判官

敕具官某爾有志當世結知慈皇守郴陽使湖外又皆有聲績可紀今日有用之才也東川飛輓之重不以輕畀叱馭而往毋憚馳驅撫摩吾民廉察羣吏以稱外臺耳目之選是惟休哉

謝源明直煥章閣知溫州

敕具官某朕遴選諫臣以廣聽覽爾頃居九列旋冠宰

掾察其堅正擢在騎省論事不回方嚮於用銜恤而歸
念之不忘亦既即吉起鎮東土惟永嘉在左浙為望郡
山川秀發衣冠鼎盛四邑相去才百里而負山並海壤
地深遠人物日庶事亦滋繁非得精明和惠之人未易
辦治爾其人矣堯章寓職以寵爾行俟訖外庸登進未
晚尚其欽哉

幹辦審計司范孫太府寺主簿

敕具官景蜀之范氏如晉王謝人物輩出文獻相望爾

在今日又其翹楚也以世科發身以吏課交薦其在朝
列退然若無所修綜者而人自稱之勾稽外府姑以序
進勉紹家學以稱所蒙

趙像之福建提刑

敕具官某七閩祥刑之寄選於衆久矣以爾被服儒雅
屢持使節往司宗盟聲望日著雖無預於吏治已習知
其民風就乘輅車不俟臨遣聽訟吾猶人也必也使吾
訟乎聖人之言固未易及得情勿喜尚惟勉旃

江東連副傳伯壽直煥章閣

敕具官某朕為烈祖聖學高妙昭回之光下飾萬物煥
乎文章尊閣惟謹寓直之寵不以輕畀也以爾天資警
敏一日千里詞章精贍連收三科登著作之庭於今十
有八年矣按刑將漕益著外庸爰錫寵名以示褒表討
論潤色豈其舍諸

朱翺大理寺丞

敕具官某惟爾祖光輔思陵爾父又登從列君子之澤

未艾也爾被賞延乃能明習文法致身廷評出守辰陽
奉最以歸進之棘丞榮路無壅益勉厥職無忝爾先

淮西運副趙師霁太府少卿淮西總領

敕具官某國家分屯重兵布列江潁董饒之任必選朝
士臨之而金陵莫重焉爾決科自奮飾以儒雅有志事
功所至辦治嘗使京口見謂敏明淮甸錢幣更張之餘
賴爾撫摩調護之力民情悅服名稱益彰茲以亞卿往
司調度足兵足食復於爾觀焉尚殫爾心以副詳試之

意

廬州修城官修武郎建康都統司中軍權副將馬
再興武顯郎左軍統領毛致通武經郎左軍統制
馬適各轉一官

敕具官等合肥當淮西一面俾葺堅城以固吾圉率衆
庀工汔底於成各進厥官庸勸勞勩

同安郡夫人武氏進封才人

敕五官正宮闈日修於內則整齊品秩尤戒於私恩必

有柔儀乃容序進具封某稟資婉嫺履行純和久承膠
木之慈得備貫魚之列疏封名郡錫號小君知閱時之
滋深嘉率職之無怠登之女御示我壺彝位幾近於九
嬪爵亦儕於千石帶弓箭而待君側吾豈務於燕游理
絲枲而獻歲功爾尚勤於蠶織

知建康府鄭僑吏部尚書

敕司筦籥於留都方資賢牧典銓衡於選部當任舊人
乃播綸言載儀禁路具官某性資剛毅學力精深聲華

蚤擅於倫魁名節尤稱於傑特訓辭溫厚信獨步於一時朝夕論思率主盟於定議旋由夕拜進長天官閫部選侯洊更鎮撫秣陵謀帥復藉保釐屬興宣室之思俾趣鋒車之召渴聞讜論日佇尚書之履聲罷使羣才更賴山公之啓事毋庸俟駕亟遂歸班

趙師程大理寺主簿

敕具官某朝行簿領之官勾稽之外職業素簡惟理官設屬則有近制廷評奏當之成俾分攷而訂正之遴選

非他比也以爾天潢之秀儒雅自將試邑佐州遇事不苟且嘗列于朝矣其服朕命益觀汝能

翰林醫效王懋蕙重華宮祇應實及二年轉一官
敕具官某朕祇事重華尤謹于藥石之奉爾以瘍醫奉職惟謹亦又再歲在法當遷俾陞爾階其思所報

俞澂知常德府

敕具官某武陵為湖北名邦以壽皇潛藩地望增重總數州之戎事控五溪之喉衿未嘗不選侯而用焉爾出

儒門明習文法有公廉之操得溫厚之稱嘗守高安政
適其平郎曹卿寺踐歷滋久起家剖符往鎮遐服明聽
朕言無輕民事

中奉大夫煥章閣待制知鄂州王信磨勘轉官

敕一麾出守久著于民庸三載陟明適登于吏攷乃頒
恩命俾進文階具官某性識疏通材猷敏飭西掖擅演
綸之美東臺高批敕之風易鎮會稽暢威名于近甸分
符鄂渚增形勢于上游茲以年勞應于治典雖曰有司

之定制是為增秩之殊之榮益圖爾功以謹忠報

知明州何澹母太淑人石氏該慶壽恩封齊安郡

太夫人

敕朕禮厚兩宮當累洽重熙之際年登八袞奉隆慈備
福之尊乃推老老之心庸廣親親之道具封某氏起自
名族嬪于大門善相其夫為部使者之貴親見吾子任
中執法之嚴方乘輕軒以就祿養逢國家之慶需開湯
沐之新封位正小君爰擇黃岡之勝恩隆晚歲式增彤

管之華益介壽祺以儀閨閭

太府少卿吳珽太府卿淮東總領

敕具官某國家東巡吳會列戍江淮惟此丹陽尤為近
屏護餉既久可後褒升爾儒雅雍容克勤吏道詳歷版
曹司金之職遂登外府亞卿之華頃以王臣往給軍食
調娛酬酢上下帖然就加惟月之班其服自天之寵勿
替于舊益圖爾功

迪公即李閱父儀甫該慶壽恩封承務郎致仕

敕具官某爾積行有素年過九齡有子在官實應封典授之京秩以為爾寵

宮人張氏封郡夫人

敕朕日聽外朝退修內治婦官具設尤嚴陞給之分恩命所加必視功容之懿具位某氏雅稱柔履選自良家事宮壺以服勞閱歲時而滋久啓封名郡進位小君仍頒祿秩之優庸示禁庭之寵其祇渙渥益懋芳猷

訓武郎臨安府湖州巡轄遞鋪梁青違滯金字牌

降一官

敕具官某置郵所以傳命令達章奏矧制閭動係邊事
可少稽乎爾怠於職行不以時奪爾一階以懲不恪

國子錄陳邕武學博士

敕具官某爾掌教國子蔚然有稱嘗對便朝論事尤切
長于右學益觀通才武尚止戈兵實貴謀其以斯意訓
迪學士庶幾得有用之才以備將帥之選焉

王介國子錄

敕具官某士登甲科立致臚仕亦惟行誼有以稱則得之斯無異辭爾當龍飛之初居俊秀前列輔邦入幕以儒雅飾吏是能稱此科級者擢居冑監典我教事又能稱此使學者宗之則爾之進未艾也

樞密院編修官許介宗正丞

敕具官某司宗有丞在頌臺憲府之間非列寺比故其選甚高爾蚤擢乙科嘗試劇縣慈皇聞其善政就加增秩之寵再入修門其才益著比以編摩之職攝郎省參

宰掾矣茲登清途務修寶牒益謹厥職以究爾長

王旣戶部郎官

敕具官某版曹掌國之大計而左民尤為繁劇州邑之
訟有不得其平者率造焉思得疏通詳練之士久矣爾
源流家傳緣飾吏事往使於蜀精敏有餘操贏貲以蘇
疲瘵嘗加詔獎召對便朝審其可用往振茲職益觀汝
能

夔路運判馮震武戶部郎官四川總領

敕具官某朕惟武王不忘遠之意西南萬里選才尤詳矧總餉之寄動關軍國見大夫臨遣而行或不及事爾蜀國之產嘗列於朝觀風夔門能宣德意加以民曹之職就董五十餘州之賦以給營壘之師民力困矣軍須方繁足食足兵佇觀儒效

太常寺主簿張貴謨司農寺丞

敕具官某爾學術該通論議根據一時清流也頃試劇邑乃有能聲蓋嘗見於用矣勾稽頌臺進丞農扈雖曰

曾預禮樂制作之事要須詳試簿書期會之間爾惟通才其體此意

太社令陳峴太學博士

敕具官某爾以紹興法從之孫自奮宏博之科宜仕於朝久矣徊翔幕府列屬容臺賢士之關師儒虛位疇咨多士僉曰汝宜溫故知新爾其自勉

判建康府葛邲改判隆興府

敕由端揆以殿邦允藉保釐之略為上流而易鎮更資

撫御之才爰授左符載揚明綽具官某謀猷宏達德度恢洪三世名儒益致家聲之顯兩朝異眷遂專國秉之隆矧惟舊學之臣久處洪樞之任密參廟算既兼文武之資祈解政機遂付軍民之寄加延恩而寓職視上宰以疏榮顧陳義以甚堅為相攸而改命惟襟江帶湖之地可以優賢皆耕田鑿井之民正宜坐嘯其為十運之帥式邁千騎之行噫嘗本五兵彌覺偃藩之重周知萬務豈云斂惠之難尚訖外庸益綏休寵

新除吏部尚書鄭僑龍圖閣學士依舊知建康府
敕召還選部行領從臣之班居守陪京復分方面之任
選用之遴中外則均具官某望重兩朝才高衆俊以三
代之文掌我帝制以六經之學格於君心頃由天官出
鎮閩部旋畀保釐之寄實資鎮撫之功尚書喉舌之官
固應圖舊河東股肱之郡故特召君矧荒政之方修亦
遜章之沓至俯徇借留之志益高難進之風龍閣陞華
用為爾寵麟符增重克成厥終益著外庸以綏渙渥

知臨安府錢塘縣趙盛太社令

敕具官某惟爾先正光輔高皇配饗廟廷燕及後裔凡爾昆弟序進於朝社稷之司不以輕授靖共爾位毋忝爾先

新知潼川府楊虞仲真秘閣知夔州

敕具官某夔子之國號稱夔門蓋蜀州之喉衿也謀帥之重實難其人爾西南望士三持使節蜀之民服爾名已久爾亦習知風俗之詳矣潼川未行易鎮茲部寓直

中秘以為爾寵民生凋瘵非他路比罷行利害沆可小
康其尚勉哉以稱推擇之意

進士張昉陳舜咨賑濟補承節郎

敕某人荒政之修觀分為急爾出私儲以濟饑民何愛
一官用勸來者

承信郎權貨務檢法使臣錢煜收趁增羨轉一官
敕具官某權山海之利以佐邦儲賞典最厚爾奔走其
下亦預進官尚勉公勤思有以稱

陳謙夔路運判

敕具官某夔門為蜀要衝川陸險絕刀耕火種民生甚難將輸之寄甚重郡計實仰給焉非通敏之士不在茲選以爾有用之學游試劇繁以南蘭陵吏課之最領湖右斂散之權茲為朕行調度一道撫惠疲氓務去泰甚使田里得以安其生則朕之顧憂寬矣

知台州徐子寅廣東提刑

敕具官某朕念廣東憲臺之重疇咨其人思得資高而

練事法明而尚寬者居之大臣謂爾為可且曰是嘗為
卿為部使者帥維揚矣中更退閒起為漢東而治辦丹
丘之政民安而歌之使持節以按嶺海其必有以稱欽
恤之意朕曰俞哉武邁其驅母替朕命

奉議郎提轄權貨務謝儼收赴增羨轉一官

敕具官某權筦之繁總於京邑爾不欺於職濟以變通
歲入之貲坐致贏羨可無褒賞以勸後來其祇增秩之
恩益謹有司之守

提點坑冶鑄錢趙不迹淮南運判

敕具官某朕惟外臺飛輓之司莫如東淮委寄之重兼
憲使刑辟之任當使客冠蓋之衝欲求通才得我賢族
以爾奮由科級尤精吏能擁麾榮于三州屢書課最總
貨泉於六道武阜邦財俾行邊疆進專漕計尚思忠報
益著外庸

文思院造皇太后尊號冊寶監官從政郎陳庶監
門儒林郎黃概各循一資

敕具官某朕以月正元日奉徽稱於祖后白玉之牒鏤刻甚工黃金之璽一鑄而就雖曰有司之職實惟莅事之勤各進爾階庸示嘉寵

幹辦審計司劉誠之太常寺主簿劉德秀大理寺主簿

敕具官某等列寺之屬職皆勾稽惟容臺禮樂是司實預討論之事惟廷尉刑獄至重實分讞議之司銓叙人才者尤不可輕授也以爾誠之聲稱籍甚持以靖共爾

德秀文采蔚然不事表襮茲庸並命其進未央尚體優恩各揚乃職

福建提舉張濤提點坑冶鑄錢

敕具官某國家分道遣使各揚乃職惟貨泉之寄總六道百郡之權歸於一大有司視漢之鍾官辨銅其重甚矣非得通儒不以輕畀以爾抱負不凡詞章精贍出入朝行見謂老成使於二部皆有聲績舉以命汝其為朕謹調度察姦欺使邦財阜通朕豈久汝於外哉

宋之瑞福建提舉

敕具官某爾以儒學之秀三仕于朝滋嚮于用而又引去朕亦念之七閩斂散之司職優而事重疇咨庸使起爾于家士之宦學不以仕已為喜愠上乏用人豈以中外為重輕爾尚勉旃以俟光寵

從政郎揚州司法林樺搜獲銅錢循一資

敕具官某邊郡嚴錢幣之出而吏多不虔爾能摘狀遂正其罪選階之進以懋爾勤

四川量試宗子伯揚時敏補承信郎

敕某人爾在屬籍遠處蜀道能以文藝優占科級錫之
武爵尚其勉旃

鎮江都統閻世雄管軍五年職事修舉轉遙郡刺
史

敕具官某國家分遣禁旅列戍江城京口捍蔽行都最
為要近爾以宿將坐總戎韜威名隱然壁壘清謐五年
于此宜賞賢勞遙刺侯邦是為異寵益思忠報毋替厥

初

慈福宮內人安化郡夫人方氏彭原郡夫人高氏
清河郡夫人鄭氏竝轉國夫人胡氏蘇氏張氏竝
封郡夫人

敕朕承累洽重熙之運奉隆慈備福之尊疇咨女御之
良爰畀恩光之渥具位某氏稟資婉嫕植行柔嘉選在
掖廷蚤備婦官之列事予祖后寢更歲籥之深屬慶典
之告成演褒綸而逮下進封大國

胡氏蘇氏張氏
云啓封名郡益懋

小心

煥章閣待制趙不流換正任承宣使知大宗正事
敕擁東越之麾方騰吏課糾成周之族有賴宗英優加
留務之班式寵從臣之舊具官某氣和而智敏屬近而
行尊風分帝胄之華寢歷仕途之久政成京邑嘗進貳
于司空身處輔藩訖褒升于次對來奉便朝之覲俾專
屬籍之盟示我異恩超廉車而授職藉卿宿望壯磐石
以承休是曰當才奚勞多訓

修職郎鄭守仁賀正旦使親屬循一資

敕具官某爾父頃使敵國爾雖不預行役而善于子職
使行者不內顧而居者得所安勞還之初亦被醲賞舉
行于今尚其祇服

修職郎李良臣奉使書狀官循兩資

敕具官某歲遣信使信聘殊鄰凡預驅馳均有勞還之
賞矧以鉛槧為職潤色使華疊進選階于汝何吝

慶壽詔書宗子年八十以上使臣年八十以上願

致仕者竝轉一官定詞

敕具官某朕以正月上日奉祖后萬年之觴需澤四方

及人之老爾在屬籍春秋益高進以一階用華晚節

使臣

云爾在右列引年告老

進官一等是為優恩

宗子汝种與昉補承信郎

敕具等爾在屬籍逢時覃霈能以文藝自叙科級予之

武爵尚其勉旃

淮東提舉陳損之創立紹熙堰除直祕閣

敕具官某水利本以惠農常平使者之職也爾使淮東
善于其職建議任責迄觀厥成俾來以圖如指諸掌閉
縱隨時條流有序綿亘及數百里之遠灌溉為千萬頃
之利農商俱濟旱澇無虞使客漕運之往來咸有賴焉
謝安為埭人以召伯名之爾通敏有餘不擾而辦名以
紹熙淮民不汝忘也寓直中祕以寵爾勤朕所以待汝
者何止是哉

姚槩知邕州

敕具官某南晉深入領右控制蠻方唐則分建五管今亦併護數州權任亞于連帥選侯顧不重哉以爾莅官不苟有趨事赴功之心治施於靖咸有聲績班班可紀今又命爾以此邦固圉寧民尚其勉哉

大理少卿許及之權禮部侍郎

敕廷尉天下之平游居卿列宗伯春官之貳徑入從班是曰異恩實由親擢具官某才兼數器識綜九流蚤以多文之儒務為有用之學方彈冠之伊始已脫穎而不

凡禁閹拾遺得真諫官之譽藩方作牧有古良將之風
比因奉最之歸俾造明刑之任惟慶霈既行之後當郊
裡再舉之時儀曹久虛禮典誰屬釋爾平反之重參予
制作之司有功過于張之賢朕所知者虞舜命夷夔之
事汝則兼之益勉告猶斯為稱職

四川茶馬朱致知京西運判

敕具官某襄漢將漕之寄雖所部不過數州而實兼諸
使之職控制邊要仍居上游不輕以授人也爾起世家

能以儒雅飾吏事嘗守申伯隨侯之國又三使於蜀矣
萬里召還復畀華節惟爾鼻祖致身九卿以桐鄉之膏
夫為漢世之循吏爾其苗裔當慕前烈以此位而行志
豈不易于一嗇夫哉

訓武郎監榷貨務陳仲堅收趁增羨轉一官

敕具官某榷筦之重總於中都爾能其官歲入贏羨加
之命秩以勸後來

倉部郎官鄭湜大理少卿

敕具官某國家刑辟之寄總于廷尉而職則分任焉使
習憲章者視獄之成而審聽囚徒必命儒者臨之其旨
深矣爾少而發藻善為詞章立朝有鯁亮之稱治民有
循良之效總餉江左威譽日聳郎潛未久卑爾臬事能
深知設官分職之旨斯無負今日推擇之意往贊而長
亦惟欽哉

起居郎陳傅良祕閣修撰嘉王府贊讀

敕具官某漢四皓起商山羽翼之功千古稱之朕則歎

焉使高帝能以卑辭厚禮聘之以輔其子則善矣爾以
一世名儒羽儀於朝抗議不回引去甚亟爾與吾兒游
舊矣爾既厭直承明之廬予亦閔勞以侍從之事寵之
祕撰之寓職來為朱邸之賓僚尚遘其行庸副虛佇

帶御器械霍汝翼復元官轉觀察使

敕具官某侍御之臣苟曠瘼而必罰歲時既久俾牽復
以自新爾舊服禁嚴雅稱詳謹佩侯邦之組綬官簿寢
高屬宸陛之橐鞬戎容甚肅頃懲慢弛知務省循况更

政典之修經授廉車之秩益思恭恪以對寵光

文林郎張允中該修壽皇玉牒循一資

敕具官某寶牒成書嘗頒醲賞汝供刀筆亦與進官毋
曰例遷其思所報

前知建昌軍趙彥禮拖欠月椿錢降一官

敕具官某盱江本江右佳郡一人壞之毒流至今爾自
力于政而承積弊于二十餘年之後給餉有闕無所歸
咎稍鐫一秩以儆後來


沈合知岳州

敕具官某岳陽據荆楚之要郡雖小而地望實重焉爾清約詳練資歷寢深惟爾兄舊鎮長沙威望凜然父老類能道之試郡云初母忝家聲則知共理之意

趙不遇江西提舉

敕具官某爾頃以吏課之優為郎起部出守輔郡蔚然有聞江右斂散之重俾爾持節以臨之昆弟三人少則俱列于儒科今又分道而為使者遠有光華宗盟之美

談也其勉爾事以稱所蒙



攻媿集卷三十九

欽定四庫全書

集部

攻媿集卷

四十一

詳校官右中允_臣薩敏

主事_臣呂雲棟覆勘

總校官庶吉士_臣倉聖脉

校對官中書_臣王鍾泰

謄錄監生_臣張鱗

欽定四庫全書

攻媿集卷四十

宋樓鑰撰

外制

知婺州葉翥知紹興府

敕輔郡承流久不聽尚書之履价藩謀帥茲又懷太守之章允謂才難莫先德選具官某智周慮表學紹儒先踐敎既歷三朝侍從亦踰一紀愛人利物由天性之自

然足國裕民處地官而最久屢更劇地深惠疲氓盡銷
愁恨歎息之心尤見勞來安集之政眷惟東土密邇行
都先帝上賓將奉因山之役大邦維屏益嚴分閫之除
惟爾通材稱予隆委規模素定既所臨而有聲威信兼
行當不擾而自辦佇聞成效奚俟多辭

新知紹興府倪思知婺州

敕具官某視禁林之草允藉通儒分輔郡之符俯從忱
請相攸既審易地皆然爾學優而醇文麗以敏早登宏

博之選徑上清華之途翰苑詞垣擅兩制絲綸之美經
帷史館極一時筆橐之榮擢貳儀曹獨司邦禮拭圭出
使握節言旋曾坐席之未溫俄抗章而自列豈久勞侍
從之事遂厭直承明之廬懷會稽太守之章至勤再命
繼東陽隱侯之詠去擁一麾勉為朕行毋輕民事詞人
而任岳牧初無內重之偏宣室之對鬼神當俟政成之
後

夔路運判陳謙湖北提刑

敕具官某爾以君子儒為湖北常平使者蠻徭披猖省民驚擾船粟而往哺之爾之職也因攝憲臺併任其責就設方略隨以撫定朕聞而嘉之可謂不辭難者矣乃酌帥臣之言姑輟夔門之役茲庸命汝持刑本道以慰民望以獎爾勞其思永圖靖此一方不汝忘也

湖北提刑王謙湖南提刑

敕具官某部使者之選以風采為先所以寄吾耳目于千里之外不欲其數易也以爾志操不凡居有直氣其

在郡邑聲望翹然持憲湖陰正欲倚重易節隣部非以便爾之私又將于爾乎觀焉尚勉之哉

判太史局降授夏官大夫吳澤降授中官大夫荆大聲降授中官正劉孝榮同判局降授局令周端友並復元官

敕具官某等天道高遠王者欲求端于上必有日官以司之爾善于觀象見謂老成頃以不謹嘗鑄命秩涉期而敘法也勿以為宜得而忘所報

修武郎監建康府榷貨務門茅恭收趁增羨轉一

官

敕具官某榷貨之在留都歲入甚夥增羨之賞司闕者亦預焉進爾一官益勉而職

建寧府浦城知縣鮑恭叔降兩官永不得與親民差遣

敕具官某縣令與民最親獄事所宜深察也爾為大邑以重辟告于郡卻而復上幾限平民于死迨冤狀既白

而欲便文以自解乎外臺有言奪汝二秩不復使任臨民之官尚為輕典也

中大夫煥章閣待制趙彥操轉一官致仕

敕鎮五羊之地方通持橐之班叩九虎之關忽上桂冠之請是為宗老宜厚寵章具官某受才素優莅政尤敏早參民部旋自逸于燕閒晚歷藩方嘗屢騰于課最眷南海折衝之略升西清次對之聯聞囹圄之屢空見里閭之不擾胡為感疾遽欲乞身念帥閭之幾年進文階

之四品鄭尚書之威信日佇來歸漢大夫之優游諒深自得以華晚節以勵能臣

帶御器械某知閣門事

敕設上閣之官豈惟掌朝會之事選名門之子抑以儲將帥之才具官某志在事功家傳韜略奏最于淮陰為侯之地易鎮于亞父所封之城聞父喪而棄官入洛其孝承召命而引道朝賞其忠釋苴杖以趨班屬橐鞬而衛上授之以仲叔圍之任可使當公西華之言惟子道

臣道之知方宜軍容國容之俱習是將用汝尚其勉旃
武功大夫殿前司選鋒軍統制李浩總轄牧放合
轉一官久任有勞轉行遙郡刺史

敕具官某兵久不用軍中累年勞以進武爵率有止法
無得踰焉以爾久任戎務舉軍推其能出視駟牧善修
馬政寵以郡刺史之職蓋異恩也其奮事功以圖報稱
侍御史張叔椿權吏部侍郎

敕朕祗膺丕緒董正具僚六部之分莫如選部之為重

小宰之事豈應冢宰之兼行輟而風憲之嚴司我銓衡
之舊具官某性資凝粹論議正平襲永嘉之儒風蚤收
科級守文昌之家法雅擅鄉評再策足于朝行幾問津
于禁路進班柱史君舉必書攝事天官吏姦無蔽自擢
居于橫榻久肅正于南臺當予御圖三日之裨俾爾正
位貳卿之列規模素定要須甄拔之盡公藻鑒益明無
使賢愚之同滯副茲隆委成爾脩名

左司諫章穎侍御史

敕具官某朕臨御之初精求政體正心以正朝廷正朝廷以正百官朕之所務也然一朝之綱總于憲臺一臺之柄屬于端公茲得其人他可類舉以爾秉心堅正燭理融明學問之懿察于朱邸橫經之日風節之峻見于諫省論事之際不俟信宿擢之南牀其為朕別白正邪振舉蠹弊使君子有所恃小人有所畏四方風動而朝廷益尊于予初政豈曰小補之哉

右正言黃艾左司諫

敕具官某古者天子有諍臣七人而後之諫官不過一二苟非精擇正士何以補袞職之闕哉朕御圖伊始下詔以來直言舊學之臣聲著騎省首命序進以示四方爾發藻士林負敢言之氣事朕宗邸動有箴規輟任拾遺兼侍經幄風采凜然聞于中外茲庸命汝官以諫名予違則汝弼汝言則予從豈惟身處寡過之地庶幾海內之士聞其風者有樂告以善道之益焉

國子司業李祥宗正少卿

敕具官某爾樸茂忠恪見推士林頃貳司成學者厭服
蓋平日踐履之效是可以聲音笑貌為哉司宗少列位
亞容臺叙百世之本支修累朝之史牒惟老于文學著
述不倦者可以當之舉以命爾公論惟允勇退之志亦
可以少回矣

吏部郎官葉適國子司業

敕具官某國家萃天下英才而置之學選于衆而為之
師經術由此而明人物由此而出宣細故哉朕御圖之

初思欲作新學者耳目求當今第一流素為天下士所推服者以正師席宜莫如汝矧茲郎潛資望俱稱故用之不疑傳不云乎善待問者如撞鐘叩之以大則大鳴叩之以小則小鳴惟汝足以當此哉

司農少卿蔡戡司農卿

敕具官某大農本周稷之業自漢名官以來惟朱邑號循吏鄭康成為大儒唐之段秀實以忠節自奮官人以重顧不信歟爾以儒術治行選為少列徊翔朝行最為

舊人進而為長雖曰序遷益勉所長以紹乃祖之風烈
何止為此官之重哉

劉光祖司農少卿

敕具官某忠直之士為國之寶本朝名臣豈無以直道
去國者旋復召用以至大位此又祖宗之家法也沉爾
予之舊學相從有年執法殿中號稱謇諤雖嘗引去聖
父任以外臺帥閩之寄不使之一日家食也茲庸命爾
為少列于大農實為多士先尚遒爾驅以副朕傾徯之

意

顯謨閣待制黃裳給事中

敕眇予冲人臨政伊始惟我太上知卿最深朱邸談經
專任以輔導之事銀臺批勅又屬以出納之言雖抗論
而遷厥官終留行而不使去至今日而復用豈人力之
能為具官某學貫九流識通千古世居劍外擅蜀士之
雄文地近關中挾西人之勁氣是非邪正惟務體國利
害禍福不知有身久從吾游備見爾蘊迨此纂承之日

付之封駁之司將求多聞毋替諄諄之誨不負所學會
觀諤諤之言倚注方深權輿于此

新除起居郎陳傳良中書舍人

勅朕嗣膺大統收攬羣才朱邸賢僚豈容居外紫垣老
手宜俾為真具官某學探聖原文追作者論議多先儒
之未發行藏惟古人之與稽相從兩載之餘信為三益
之友謂左氏真得春秋之旨謂周官實為太平之書推
祖宗之本心明政事之要道昔信其說將行所言首畧

故官洊加新渥矧是纂承之始尤資播告之修大老之居海濱是將焉往舊學之遯荒野其遂來歸式遄爾驅以副朕望

起居舍人彭龜年中書舍人

敕中書造命之地實王政之所先內史代言之官非賢才而孰處我有舊學時為名流擢登詞垣實預國論具官某為有用之學抱軼羣之才惟其善養之氣剛遂使所居之官大班分螭陞視言動而必書額叩龍墀抗威

顏而不撓方朱邱橫經之日多赤心憂國之言迨膺超
除深允衆望訓詞溫厚爾其振盤誥之文朝夕論思爾
毋廢箴規之益尚圖忠報奚事多辭

將作監黃由起居郎

敕具官某王者嗣膺丕祚首用舊僚非欲私我所與而
厚平日之恩蓋將舉吾所知以來當世之士列爾二史
助予一人以爾蚤冠儒科久儀朝路不以仕已為意而
益進于學不以利害為計而務極其言囊封既効忠嘉

殿陛尤加剴切被眷知于慈展為賓友于王門迨初政之方新與羣英而並進入則侍螭頭之左凡論事而直前出則班豹尾之中亦在法而當從是為爾寵期懋予衷

著作郎沈有開起居舍人

敕具官某朕踐阼云初涉道尚淺實賴二三元老力濟多艱更資左右近臣交修不逮惟平日賓僚之舊分一時言動之書匪予敢私惟爾能稱爾詞華敏瞻學術淹

通蚤蜚場屋之聲名久歷膠庠之師表以著庭而兼史
筆之重由郎省而參宰掾之司比從予遊實自親擢學
為可用閱義理以滋多中自不欺樂講論之日益其居
柱下密侍朕前尚思嘉猷以助初政

參知政事陳騭知樞密院事

敕九五正位方承太上之傳二三大臣俱極當今之選
用人由舊錫命維新既久貳于政機宜進專于省府具
官某氣剛而不撓德盛而有容以博學篤志而為世醇

儒以正色直道而致身近輔斯謀入告則惟后之德一夫不獲則時予之辜厚重若絳侯而有多聞之學彌縫若如晦故無揚己之名朕念周業之艱難慕漢機之周密矚我元老長予本兵藉東省之猷為領西樞之方略事均一體威示四方噫折千里之遐衝顧豈圖于近效建萬世之長策正有賴于訐謨其務同心以康庶事

同知樞密院事余端禮參知政事

敕文武兩途實歸一道東西二府允賴兼資粵予非涼

膺此付託乃進鴻樞之貳俾參駸駸之嚴具官某宅心粹夷植操堅特凜凜有大臣之體謙謙得君子之風壽皇知臺察之名擢居法從太上眷儲僚之彥授以本兵唯然形憂國之誠卓爾任正君之責言婉而切氣勁以溫故于宥密之司率藉調娛之力稽之公論蔽自朕心欲新政之設施宜舊人之圖任是資共二有賴同寅噫朕方求內外之安經理于上爾尚慮軍民之要彌縫其間庶幾有成其永無斁

覃恩文臣承務郎以上轉官選人在任并嶽廟循
資定詞

敕具官某朕奉太上之慈訓嗣守丕圖踐阼之初大數

需澤京秩而上咸進厥官

選人在任云凡預選階有官
守者皆許序進嶽廟云雖食

祠祿咸
許序進

蓋將樂與士夫共起治功也各揚乃職以稱異

恩

文臣承務郎以上致仕定詞

敕具官某朕仰惟太上不俟倦勤傳祚眇躬覃需之頒

仕者進秩雖致其事亦預此恩老吾老以及人之老王
者之仁政也朕心庶幾焉

端明殿學士知江陵府王蘭資政殿大學士知潭
州

敕朕嗣居九重臨制萬國若刺史縣令之衆未暇究詳
惟方伯連帥之功首當褒表眷時元老當秉鴻樞撫荆
楚者有年易湖湘之重鎮具官某受天間氣為世名臣
直節高風真可立懦夫于百世之下宗論宏議將欲舉

明主于三代之隆受知兩朝致位四輔過江而見王導
有國何憂舉衆而得臯陶不仁自遠控長江之都會建
大將之鼓旗固邊圉以內周宣王靈而外暢惟予初政
之急念茲舊弼之賢下詔求言方期樂告視邦選牧有
賴于蕃惟此昭潭峙乎南服帶洞庭而負喬嶽扼嶺嶠
而震蠻徭藉卿威名壯我藩翰加以大學士之貴用為
東諸侯之先噫陶公之封長沙足倚上流之重賈傳之
對宣室已深前席之思尚邁十乘之行以慰一方之望

知常德府袁樞右文殿修撰知江陵府

敕具官某荊州居國上游自古為用武之地謀帥之重
每嘆才難以爾鯁亮之資淵博之學養氣以義不撓不
阿有憂國愛君之心有憤世疾邪之志一辭禁閹家食
累年起鎮武陵治行昭著寵以論譔之職以殿是邦朕
承丕圖臨制四方萬里之遠謂斯民宅生于刺史故大
明黜陟以示好惡由支郡而受閫寄爾實為初政第一
選固圉靖民可不懋哉

兵部尚書羅點父奉直大夫朝俊覃恩贈中散大

夫

敕朕祇荷慈謨嗣膺大統爰敷曠蕩之澤以及中外之
臣矧喉舌是司兼領典銓之重而松楸在遠方深陟岵
之思乃分寵光用賁冥漠具官某天資純茂族系繁昌
早為君子之儒稱于里社自樂先王之道老矣丘園尚
及邠超入幕之賓不見紀騰隔屏之坐素多隱行遂為
大門茲登五品之宗足慰九原之望賢子方用侯封未

大其歆綸誥之恩繼有蜜章之渥

參知政事陳騄該覃恩封贈

曾祖太子少保敎太子太保

敕朕祇膺慈訓勉紹丕圖允賴邇臣共濟萬幾之務爰
因惠澤特推三世之恩具官某積善素深本心無競恂
恂有守既高月旦之評坦坦無營自樂衡門之老侈厥
餘慶流于後昆進參政地之崇追賁儲僚之峻肆由亞
保薦錫明綸用昭寵靈以慰冥漠

曾祖母始興郡夫人成氏河南郡夫人

敕朕履位云初均福于下有如近輔之重可後會門之光具封某生于儒家嬪此名族動謹珩璜之飾克供蘋藻之儀是有聞孫晚參大政易翁源之舊壤開河內之新封陰報可知寵光未艾

祖太子少傅策太子太傅

敕圖大宅中方布維新之令建極歛福寔均共政之臣爰舉彝章加賁先世具官某履行純固稟資粹和福祉

未央見生子生孫之盛人門俱勝無慙卿慙長之名申

命九泉遂登六傳

○六傳見晉書何劭傳一本作太傳與下句意義混不可從

茲進

在前之職用為有後之榮尚惟不忘其克祗服

祖母和義郡夫人朱氏博平郡夫人

敕惟時近臣翊予初政厥有霈澤光爾前人具封某素

稟嫺柔能循法度中饋攸職宜其室家慶源既深有此

湯沐載啓博平之號益崇石窳之封是為異恩以詔幽

安

父太子少師諱太子太師

敕維予冲人嗣大歷服無疆惟休均暨海宇凡列朝籍
皆得以榮其親矧二三大臣顧可後歟具官某尚友古
人為世善士安時處順不求聞達蘊蓄弗露是宜有子
既執政柄寵及泉壤義方之訓蓋可驗矣乃進宮師以
慰雨露之感英靈不昧其尚寵嘉之

前母平樂郡夫人成氏文安郡夫人母咸寧郡
夫人王氏濟陽郡夫人

敕大寶是守賴茲臣鄰湛恩普覃燕及禰廟具封某克
遵壺範能謹婦儀舉案事夫聿追德曜之美斷機教子
無愧軻親之賢既陟近臣屢揚卹典茲載疏于新寵用
加峻于小君以寬吹棘之思庸示漏泉之澤

妻東牟郡夫人宣氏封魯郡夫人

敕丕緒紹隆方履重熙之運臣工翊贊宜均內助之恩
庸頒鸞誥之華以詔魚軒之貴具封某靜專自守儉約
有聞作配名卿能勉以正克主中饋用肥其家視夫爵

以疏封由霈恩而改命乃疇曲阜載錫贊書尚迪令猷
以祇茂渥

禮部侍郎許及之該覃恩封贈

父朝奉郎樞贈朝請郎

敕朕祇荷慈謨嗣膺大統爰敷曠蕩之澤以及中外之
臣矧吾貳卿欲罷先世可無渙渥以發潛光具官某坦
坦幽人恂恂長者惟居鄉不變其素守而教子能知夫
義方隱行有聞陽報如響親見儒科之擢蚤欣宦牒之

榮遠奉安輿既愴九原之隔茲特禁纛何勝三釜之懷
超官簿以升階冠郎曹而視秩是為曠典少慰孝思

故母安人呂氏贈令人

敕九五正位方承與子之傳小大羣臣俱有榮親之典
載頒明命以示寵光具封某淑靜自將柔嘉可度嬪于
善士克共蘋澗之儀生此名卿徒起棘薪之嘆既更事
任遂陟禁嚴爰疏告第之恩以顯漏泉之澤尚其冥漠
式克欽承

繼母太恭人五氏封太令人

敕

此下同前九五正位六句

具封某雅著壺彝恪循婦道儉勤自詔

允為中饋之賢甘旨承顏坐享安輿之奉既登眉壽茂擁多祺乃因霈澤之行超示疏封之寵其祇朕命益侈爾榮

故妻安人洪氏贈令人

敕凡我從臣均此大需爰及閨房之秀並膺綸綍之華具封某鍾慶相門流芳女範蚤從名士將仰望于終身

胡晉永年曾不登于中壽迨躋顯用嘗賁卹章茲超命服之榮用錫幽局之寵姑從告第以慰悼亡

妻安人潘氏封令人

敕

此下同前凡我從臣四句

具封某稟姿靜專處已冲素動遵女戒

克循待傳之言躬習婦儀果見從夫之貴治組紉而有度奉溫清以尤恭象服是宜鸞牋增寵其服恩光之渥以彰內助之賢

煥章閣直學士中奉大夫丘憲磨勘轉官

敕具嚴銓法所以示百僚之公優待從班猶不忘三載之攷爰頒命綍俾進文階具官某以拔萃之才負爽邦之望進貳民曹之重心計有餘出臨井絡之區威名益遠方謀陟典適會年老遂升漢大夫之名用為蜀太守之寵其祇渙渥嗣有殊褒

見任侍從該覃恩轉官

兵部尚書羅點

以下首尾詞同

敕朕嗣膺鴻祚祇適燕謀九五正位之尊何德以稱二

百餘年之業得人乃興眷惟禁路之英皆我慈皇之舊
爰因覃霈首示優恩具官某以經世之才為致君之學
早登朝著益顯時名久居侍從之班務竭論思之蘊末
光之依日月既親遇于三朝聽履而上星辰足儀刑于
百辟方藉嘉謀之告亟升命秩之華其務同寅以光初
政

工部尚書趙彥逾

具官某砥礪廉隅磨礱事業挺身徇國是為貴戚之卿

正色立朝遂陟文昌之貴

翰林學士李獻

具官某德必有言文斯賈道蚤儀鵷序徑登紫橐之華
進直鸞坡久被金蓮之寵

刑部尚書京鏜

具官某學博而智明才高而用大出分方面曾遠瞻于
王靈入踐文昌實坐司夫邦典

兵部尚書耿秉

具官某持論不阿修身無玷參華武部久儀法從之班
共二瑣闥克振塗歸之職

工部侍郎謝深甫

具官某忠結主知才周世務雍容禁橐屢形批勅之風
潤色邦條雅得稽經之意

給事中黃裳

具官某性稟精忠學窮興義潛藩勸講賴誘進以最深
瑣闥除官冀塗歸之如昔

中書舍人陳傳良彭龜年

具官某學貫九流名滿四海

彭龜年云學識純明謀猷深遠

橫經朱邨

遂依日月之光光制西垣期鼓風雷之號

吏部侍郎張叔椿

具官某迪德粹和受才庸敏久居橫榻實高風憲之嚴
茲任小天允致銓衡之重

戶部侍郎袁說友

具官某器度恢宏風神峻整宣威天邑政允號于神明

掌計民曹道深知手取予

禮部侍郎許及之

具官某智術疏通詞章精敏拾遺諫省雅有諍臣之風
掌禮儀曹克守先王之典

起居郎黃由等該覃恩轉官

起居郎黃由起居舍人沈有開

以下首
尾詞同

敕具官某朕嗣應鴻祚祗適燕謀九五正位之尊何德
以稱二百餘年之業得人乃興眷惟近臣實有舊學爰

因覃霈首示優恩爾早負時名進多朝望曳裾王邸熟
陳六藝之格言載筆殿坳允謂三長之良史方藉嘉謨
之益亟升命秩之華其務同寅以光初政

秘書少監兼權吏部侍郎孫逢吉

爾學貫古今識分邪正比當年責是為諫諍之臣茲典
選曹雅善銓衡之職

侍御史章穎左司諫黃艾

爾早陟殊科進多雅望曳裾王邸熟陳六藝之精微執

法憲臺

黃文云澤笏諫垣

獨振一時之風采

監察御史并卿監郎官該覃恩轉官定詞

敕具官某朕嗣服云初求賢以自助仰惟慈皇招徠衆

俊寔在周行殆留以遺朕也覃霈之恩其可後乎爾職

在六察

秘書監云擢長道在月卿郎官云列在郎曹

卿云列

序進一階往其祇

命之思所以助我者以報

在外大中大夫以上官知州府該覃恩轉官

顯謨閣學士中大夫知紹興府葉翥

以下首尾詞同

敕朕奉上皇之慈訓承列聖之丕圖需乃渙恩覃于海
宇矧是文昌之舊往宣屏翰之勞爰錫明緡俾躋命秩
具官某材猷通敏德度恢洪聽履禁途坐閱十年之久
分麾帥閩實為九牧之先方歌求助之詩仍加進律之
寵在漢比千石之秩于今為四品之階其務欽承益思
猶告

煥章閣學士大中大夫知明州何澹

矧惟中執法之舊往為東諸侯之行爰錫明緡俾躋命

秩具官某學探蘊奧名冠倫魁入總臺綱見藜藿之不
採出臨制閫致波濤之不驚方歌求助之詩仍加進秩
之寵在隋始大夫之號于今正三品之階

通議大夫煥章閣待制知建寧府陳居仁

矧是詞臣之舊往宣藩服之勞爰錫明緡俾躋命秩具
官某稟資端亮秉德忠純擅西掖之雄文最宜為誥奏
南邦之最課尤號近民

中大夫煥章閣待制知鄂州王信

矧是瑣闥之舊往宣藩服之勞爰錫明綬俾躋命秩具
官某詞源浩博才刃恢餘西掖東臺嘗備更于清選武
昌夏口正倚重于上游

中奉大夫煥章閣待制知鎮江府馬大同

矧是文昌之舊往宣屏翰之勞爰錫明綬俾躋命秩具
官某性資沈毅政術闡明持橐禁途嘗主民曹之大計
分麾京口實當天塹之要津方歌求助之詩仍加進秩
之寵昔倪寬則以誦書而擢若晁錯則由對策而除

龍圖閣學士正議大夫知建康府鄭僑

具官某學通乎百氏文根乎六經領豹尾之班雅有公
臺之望分麟符之寄實為方面之雄

徽猷閣學士中大夫知襄陽府張杓

具官某才高一世氣壓萬夫聽履漢廷有張京兆之英
譽分麾峴首追羊太傅之流風

中大夫敷文閣待制知建寧府單夔

具官某才猷膚敏政術疏通持橐禁途坐閱十九年之

久分麾侯服屢稱二千石之良

煥章閣直學士中大夫知興元府章森

具官某風儀峻整學術疏通持橐禁途當典銓衡之重
分麾帥閫屢專方面之雄

大中大夫數文閣待制知瀘州吳總

具官某家聲素著政術甚優四松而班殿廷實視從臣
之清貴五月而渡瀘水正資邊徼之威名

大中大夫煥章閣待制知太平州蔣繼周

具官某才名素著經術尤高憲府宣威尚想聞于風采
侯藩共理亦屢賦于中和

寶文閣學士奉直大夫知遂寧府宇文价

知瀘川府

閣蒼舒

同詞

具官某稟資庸敏植行粹和聽履禁途

閣蒼舒云持素禁途

嘗出

漢廷之右擁麾帥閫屢登蜀道之難

攻媿集卷四十